

25.  
Q. D. B. V.

DISPUTATIO PHYSICA

QVA

MAGIAM  
DOEMONIACAM  
CEU ILLICITAM, & NA-  
TURALEM CEULI-  
CITAM,

IN ELECTORALI AD ALBIM

ACADEMIA

EXPLICABUNT

PRÆSES

M. LAURENTIUS BUGGES,

Neo-Sedin. Pomer.

*Respondens*

SAMUEL PORATH, FREIEN-

VVALD. Pom.

*Ad D. 9 Septemb. Anno 1667.*

Horis & Loco consuetis.

*Octob.*



WITTEBERGÆ, Typis JOHANNIS HAKEN,  
M. DC. LXVII.

Blank page with faint bleed-through text from the reverse side.



on  
pr  
re  
fe  
v  
fe  
o  
v  
c  
n  
to  
u  
v  
d  
s  
n  
I  
d  
f  
in  
l



## FELICITER.

**M**irabiliter natura quandoq; ludit  
 nostra adeò ut mox perfecta dicatur, im-  
 perfecta salutetur interdum. Vulgò dis-  
 rentem cur Magnes ferrum trahat, cur Pa-  
 pyrus in Muséo pendula modò huc, modo  
 illuc, rapiatur sine motore, deque his rati-  
 ones dantem cum audit, statim obstupescit, & à naturâ opus  
 profectum Diabolo credit. Quò ipsò Eam imperfectam  
 reddere, quam longius in rationes inquirere mavult. Per-  
 fectam contrà exclamat illam, cum Unguentum Armarium  
 Vulneratum per aliquot milliaria absentem, cum tamen dis-  
 ferens exactam nullam det rationem, sanare possit, hocque  
 opus non à naturâ profectum, adscribit naturæ. Et quid tergi-  
 versatione opus? Dicam uti res est: Naturalem gubernare  
 causam, quæ in probandis per aquam frigidam lamiis, super-  
 natantes pronuntiet reas, submergentes exclamet innocen-  
 tes, dicunt quandoque sapientes, quandoque insipientes,  
 utrique errantes. Quippè Diabolo relinquenda erunt, quæ  
 vulgò naturæ sapius dantur, & naturæ non erunt detrahen-  
 da, quæ Diabolo ut cernimus semper, ascribuntur. De vir-  
 gula Mercuriali disputantur multa, adeò ut quidam actio-  
 nem ejus ad naturam seu ad qualitates occultas, quidam ad  
 Diabolum referre velint. Utraque sententia suos habet  
 defensores, Patronos; Posterior tamen Probatissimos, veris-  
 simos, decidente enim B. Sperlingio: magis Ea ex pacto  
 implicito cum Satanâ, quam ex naturâ agere videtur. Sci-  
 licet si confusio mater Erroris sequi non debeat, distingui o-

portet Magiam Naturalem à Dæmoniacâ. Quod impræsen-  
tiarum facere constituimus. Tu Rector utriusque nostro ad-  
esto Labori !

§. 1.

**P**ræsupponimus in genere; *Magiam esse habitum rerum  
abditarum scientia, operumque mirandorum arte constan-*  
*tem.* Ubi notum satis,

§. 2. Magiam non à Græco μαγία quod est discere  
proficisci, sed à Persico Vocabulo, quod nihil aliud signifi-  
cat quam Græcis σοφόν, Latinis Sapientem aut Philosophum.  
Fuerunt autem Magi Sacerdotes Medici, Physici Mathema-  
tici, unde in magno eos apud Persas fuisse æstimo constat, a-  
deò, ut docente Gellio l. 10. c. 9. *nemo ad imperii clavum penes  
Persicos fuerit elatus nisi prius Magica fuerit imbutus arte.* Su-  
mitur verò quandoque Latè pro ipsâ Philosophia seu studio  
rerum humanarum & divinarum. Unde Cælius Rhodiginus l.  
3. Antiq. lect. c. 42. dicit: *nihil Magiam fuisse aliud quam altio-  
rem sanctioremque Philosophiam.* v. B. Meisnerus P. 2. Phil. Sob.  
Sect. 2. c. 2. quandoque strictè pro habitu rerum abditarum scien-  
tia operumque mirandorum arte constante, Observante Cl. Seybo-  
thio Systh. Phys. c. 12. de Mag. §. 1. Interim tamen & Rustici  
Magiam ad suam referre sciunt divinationem. Mox alius  
ex Paulinæ diei constitutione annonæ caritatem, alius vili-  
tatem colligere tentabit. Ast magis ridicula, quam applau-  
sibilia plebs credula producere potest. Veteribus Germanis  
vocabantur ejusmodi Magi die Pfaffen/ hinc etiam reman-  
sit, ut in nonnullis cibis partes lautiores & Lectiores vocen-  
tur Pfaffen stückgen/ quia olim in Conviviis lautissima appo-  
nebantur illis uti Excell. Dn. Kirchm. in Colleg. nondum E-  
dito annotat Clare.

§. 3. Definivit verò B. Sperlingius Præceptor Defidera-  
tiissimus in Instit. Phys. l. 2. c. 4. Magiam non per Artem ut  
Theophrastus Paracelsus, ne Magiæ Theoreticæ, quæ hac ratio-  
ne expellitur inimicus esset; neque per Scientiam ut Joh. Bapti-  
sta Porta ne Regulam illam Logicam: Genus non sit angusti-  
us suâ



us suâ specie, iratam redderet sibi, *sed per habitum non simplicem sed compositum seu mixtum ex scientiâ scilicet & arte constantem.* Et ita non ingeniorum feritatem, sed rerum uti undique sectatus est veritatem.

§. 4. Hanc Magiam dividit in *Theoreticam & Practicam.* Illam nominat *rerum obscurarum & abditarum scientiam.* Qualem Anaxagoræ in ficitate etiam maxima pluviâ prædicti Plin. H. N. l. 18. c. 28. attribuit. *Hanc cognitionis ad opera miranda esse applicationem,* affirmat Idem. Secundum hanc fabricare docent specula Catoptrici, ad quorum aspectus aliquis capite asinino, vel canino, vel suillo, vel pedibus sursum elevatis, vultu in Terram projecto incedere, aliaque mira cernere videtur: quin & absque speculis in obscuro cōclavi pendulam & luminosam imaginem quasi volitare non sine metu sentit, ut Joh. Bapt. Port. l. 17. Mag. nat. c. 8. & 9. luculenter declarat. Et sane talia videre qui optat, Electoralem adeat Dresdam, ubi pectus in mirandis saturabitur factis, moxque sapiens talia ibi adspiciens glaucoma sibi objectum esse putabit; De plebe libenter, cui quod insipiens sit fat est, tacebo v. Cl. Seyboth. in Pæd. p. 89.

§. 5. Sed properamus, ut ad scopum denique deveniamus, Utramque subdividentes: in *Naturalem & Dæmoniacam.* Hacque destructa eam adstruamus. Sit ergo de Dæmoniacâ.

## QUÆSTIO GENERALIS, Quousq; se Magia Dæmoniacâ, seu potentia Dæmonum circa res extendat naturales?

§. 1. Opposita juxta se posita elucescere magis norunt omnes qui Hospites atque Peregrinos se in Logicis profiteri nolunt.

nolunt. Gratiā Lucis, recommendat quam maxime obscuritas noctis. Danus aut Svecus juxta Æthiopem collocatus eo candidior & amabilior, quo turpior apparebit Æthiops. Non itaque sine gratia Magiæ Naturalis, apposuit Dæmoniācam Excellentissimus Noster. *Hac est Privatio Habitus, quem in mancipiis suis supplere conatur Demon, & dispesci solet in tres classes nimirum in Divinatoriam, Præstigiatoriam, & Effecto-*

*nam.*  
§. 2. *Divinatoriam nominant Rerum abditarum ope Demonis partem cognitionem.* Multa de Spiritibus dicuntur familiaribus, qui includi se crystallis, annulis, capsulis, aliisque rebus, ac ita se circumferri permittunt, ut homines multivariis scientiis, quas ingenium semper optat sibi præcox, sapienter mox dixissem fraudulenter, imbuere, multaque mira & occulta Hominibus insusurrare & revelare possint. Talem Spiritum Jacobus Jodoci de Rosa nomine habuit. Ille Annulum circumgestavit, in quo exorcismis colligatum putavit Dæmonem, quem singulis quinque diebus, ut minimum alloqui, & de rebus novis aliisque consulere coactus fuit v. Wierum l. 6. de præstig. Dæm. c. 2. *Horum Spirituum alios esse Saturninos, alios Joviales, alios Venereos, alios Mercuriales, eosque certo ritu esse colendos docet.* Crispetus l. 1. de Odio Sat. Disc. 12. Cum Ergo dentur ejusmodi Spiritus, uti multis probari potest Historiis, ita merito eos referimus ad Divinatoriam hancce Magiam.

§. 3. *Præstigiatoriam admirandorum operum, sed apparentium auxilio Diaboli salutant productionem.* Illusiones ac deceptiones Diabolicas pro fundamento habet, hæc ipsa Magia, de quibus tacere quam parum loqui satius erit. Cupido multum habendi, semper vexat mortales, adeo, ut Thesaurarium etiam sibi eligant infernalem, qui post Longas in hac terra delusiones, illos denique in infernum, tanquam in damnatorum tabernaculum recipere possit. Ita refert Philippus Melancht. Homines decem Magdeburgi ruina turris oppressos esse, cum ad Thesauros, quos docuerat Satanas reperiendos, effoderent, Delrius l. 2. disq. Mag. q. 12. dicit :  
*Dæmo-*



*Demonem cuiam nobili Matrona Mosellana multa dedisse Numisma-  
mata, quae illa reposuerit in arca; Verum cum uti voluit, summum E-  
quinum reperit Loco Numismatum. Et quid non de delusioni-  
bus Fausti pueri sciunt in Plateis? Scilicet per facile delusi-  
onibus istis potest mens credula capi. Trojani vix ex pu-  
gnati fuissent, nisi Equo (Ubi tamen natura, non diabolus  
eos vexabat,) credidissent fallaci. Et multae Lamiae non com-  
burerentur, nimium si non crederent, magistro suo fallaci  
Sagaci, summas illis promittentis divitias, quas tamen ostia-  
tim quærere coguntur. Uti constat Exemplo Zigeunorum. v.  
Peic. de Incant. p. 161.*

§. 4. *Effectoriam dicunt esse admirandorum operum reali-  
um auxilio Diaboli productionem. Hæc quam maxime habet  
pro fine incommodum mortalium. Quippe ita nos miseri  
Expositi sumus his in castris diaboli infidiis, ut ne quidem  
in somno tuti esse possimus. Ita non tutus esse poterat piissi-  
mus Hiob. Summa enim & maxima diaboli voluptas est, e-  
cludere miseros, & angere mortales. Quanta vero diaboli  
malitia & potentia, tanta DEI longanimitas atq; patientia, in-  
quit Excellent. Dn. D. Pomar. Cell. Synop. disp. 13.*

§. 5. *Non autem mortuos resuscitare potest Dæmon. Multi  
aquæ submersi, alii aliter exanimati, alii ignibus injecti, &  
rogo impositi, alii in bello cæsi, post plures etiam dies re-  
vixisse leguntur. Quemadmodum de multis testatur Plinius  
l. 7. Hist. natur. cap. 52. Et Simonem Magum etiam suscitasse,  
mortuos constat ex Clemente Rom. Et Egesippo l. 3. de Exci-  
dio Hierosol. c. 2. Sic etiam Enarchum mortuum, in vitam à  
Dæmonibus esse reductum testatur Plut. l. 1. de Animâ. Verum  
non omnia quæ afferuntur sunt vera, sed multa fabulosa, me-  
ræ diaboli præstigiæ, ac illusiones. Resuscitare mortuos, est  
supra naturam, jam illa quæ sunt supra naturam miraculosa  
sunt, & à nullo ente finito & creato, ut est Dæmon perfici  
possunt; Interim tamen Dæmonem quandoque posse cor-  
pus verè mortuum auferre clanculum, & substituere aliud  
aereum, illudque movere instar viventis non negamus, sicut  
abstulisse corpus legitur Romuli, Cleomedis, & aliorum, apud  
Liv.*

*Adducitur  
quid Dæ-  
mon non  
possit.*

Liv. l. i. Plut. in Romulo. Herod. l. 4. Quandoque Eum corpora verè mortua subintrare, eaque movere, & in illis, ac per illa imitari opera, ac gestus similes viventium, insimul, atq; affirmamus. Sicuti luculentum Exemplum Delrius l. 2. disq. Magic. q. 29. Sect. i. de Cornelio Agryppa narrat, quod ex eo totum refert, Schottus Phys. Cur. l. i. mirab. Ang. ac Dæmon. c. 36. §. 5. p. m. 177. Sicuti.

§. 6. *Neq; Dæmon homines in lupos feles, canes convertere aut alias species inter se permutare potest.* Refert August. l. 18. de Civ. DEI. c. 17. *extitisse suo tempore mulieres stularias in Italia, quæ viatoribus caseum venenis infectum dederunt, quo caseo sumpto viatores in jumenta versi onera portaverunt.* Longum & mirabile Exemplum de Petro Bourgoto & Michaelē Verdung vid. ap. Johann. Wierum l. 6. de præstig. c. 11. quem si adire, non placet, adeas Schottum, ubi in corruptum illud videbis. Multa refert Plin. non tantum de Dæmarcho l. 10. c. 24. Sed & de Arcadibus l. 8 c. 22, quem vide. Olaus Magnus l. 18. c. 45. & 47. refert in Prussia Livonia, & Lithuania frequens esse, ut in festo Nativitatis Christi, sub noctem, statuto in Loco, homines maximâ multitudine conveniant, & ibidem in Lupos convertantur, qui mox eadem nocte mirâ feritate in animalia & homines sevant, &c. Addit etiam de pariete aliquo, ex diruto quodam castello reliquo inter Samoghetiam, Lituoniam, & Curoviam ad quem certo anni tempore aliquot millia eorum, ut agilitatem suam saltando explorent, convenire dicuntur; modum conversionis denique addit, & testes oculatos, si habere velis audi illos ap. Bodinum l. 2. Dæmonol. c. 6. De Sociis Ulyssis Lycaone Ovidii hîc tacebimus, cum magis fabulas Poëticas, quam veritatem sapere videantur. Minime etiam curamus Theophrastum Paracelsum transformationem hominis in lupos credentem, neque Casparum Peucerum, quem citat B. Sperling. in Instit. qui, non tam facile â veritate in falsitatem proclivis esse debebat. Dominantur quidem ad tempus Exempla, ast, ad veniente ratione cedere coguntur. Nulla anima inquam â corpore separata alienum, & specie distinctum, invadere potest corpus. Si igitur velit unam  
Spe.



Speciem in alteram transmutare formam, aliam materiam Specie distinctam introducat oportet, at hoc non potest, datur, enim semper, proportio inter materiam & formam, non enim qualibet forma potest quamlibet informare materiam, sed eam tantum quæ est proportionata. Sic forma Leonis obtinet corpus Leoninum, Canis Caninum &c. Sicuti habet Excell. Prof. Kirchm. in Colleg. Phys. olim habito. Accedit quod hæc transmutatio l. sit præstigiatoria l. merè frivolis nitatur experientiis v. Sperl. In Antropol. passim &c. ascribamus E. unicum Exemplum, in quo merus fuit Lusus, ut ex eo cætera judicari queant. Schottus l. c. sumpsit illud ex Majolo, alias illud habet Georgius Sabinus in l. 7. Metamorph. Ovid. ex quo illud rursus mutuavit. Cl. Seybothius System. Phys. c. 12. de Mag. p. m. 293. Nempe apud Borussos talis nuper fuit captus, & Duci Borussiæ adductus à Rusticis. *Erat homo deformis, nec multum absimilis fere, habebatq. vulnera in facie, quæ dicebatur accepisse morsus à canibus, ubi fuisset mutatus in Lupum.* Is à quibusdam, quibus Princeps id negotii dederat, interrogatus aiebat, se quotannis bis ita mutari solitum, primò circa natalem Christi, deinde circa festum Johannis Baptiste, illisque temporibus effærari, & cogi impetu quodam naturæ versari in Sylvis inter Lupos. Maximo autem horrore & langvore corporis se affici antequam pili erumpant & forma mutetur. Hæc Affirmanti credita sunt. Sed cum ad explorandam rei Veritatem diu captus in arce teneretur, ac diligenter à custodibus carceris observaretur, an aliquando fieret Lupus, retinuit semper eandem formam quam habuit. Is exitus fabula fuit. Scilicet ita se res habet, transmutare species, potentiam sapit infinitam, quæ unice competit DEO, Qui ex aquâ Vinum, ex Baculo Serpentes &c. producere potest. At Dæmon non item vinctus enim & alligatus est potentiæ & gubernationi divinæ. Quod melius Theologi quam Physici norunt.

§. 7. *Neg. verè generare potest.* Licet multa clara ingenia Diabolo vim generativam attribuant, quæ apud Schottum cit. l. vide; attamen in eam sententiam ire non possumus, quæ

*Ad huc magis est  
quod si quisque  
non ut dicitur*  
Dæmonem generare posse statuit. Forma informans ad  
tale requiritur opus, at Dæmon tantummodo assistens est,  
quæ se non aliter habet quam auriga ad regendum currum.  
Quinimo essentialiter Spiritus & immaterialis substantia est,  
Corpus autem istud assumptum Phantasticum & in Anima-  
tum est, penitusque ad generationem inhabile, Conf. Doct.  
Pom. l. c.

*Adducitur  
quid pos-  
sit*

§. 8. *Sed Effectus necessario futuros, quales sunt tempesta-  
tes &c. callidissime præscire de Contingentibus astutissime conficere,  
externa ad unguem scire & incredibiles alios effectus edere  
potest partim Veros partim apparentes v. Excell. Kirchm.*

§. 9. Dæmonem posse facere tempestates permittente  
DEO, concedit Wierus l. 3. de præstyg. Dæm. c. 16. *Lappos  
atq; Finnos tres nodos magica arte consecratos, olim mercatoribus  
vendidisse, quorum primo soluto placidos ventos, secundo vebemen-  
tiores, tertio vebementissimos essent habituri tradit Olaus Magn9  
l. 3. c. 16. ascribam verba Cl. Seybothii ita discurrentis; non  
videtur præter omnem fidem esse, quod de Lappis & Finnis memo-  
ratur, qui ventos secundos præcio vendunt nautis. Quorum in-  
obsequio cum sint Dæmones (maxima enim est in Septentrionalibus  
Idolomania) cur non ipsi acrem à puppi impellant, ut homines in su-  
perstitione dementatos magis confirment. Prævidentes enim &  
signis prænotantes Dæmones, quid possit natura aut suis ipsorum vi-  
ribus geri, interpellant Magos ad pares ineptias, ut hac illave pa-  
rent, ubi succedit eventus, de suo artificio bi gloriantur, seque suis  
verbis, & herbis, fecisse opinantur. Et quid multis? Quicquid De-  
us permittit Dæmonibus, illud invidere ipsis non possumus, non  
debemus. Habeant enim sibi potestatem talem, qualem nos  
exoptare ducimus esse nefas.*

§. 10. *Damnanda Ergo Magia Dæmoniaca est in qua verba,  
Characteres, demurmurationes, meræ sunt superstitiones at-  
que delusiones. Figmentum est quando dicitur quod Lojo-  
la Pater & Author Jesuitarum versum quendam Virgilianum  
recitaverit, Quò fœminam diabolo obsessam liberasse dici-  
tur. Lusus tantum est qui facile credit, facile decipitur.  
Quan-*



Quantitatis enim nullâ vis, nulla Efficacia, per se scilicet, interim hominum superstitio facit, ut, quod per se nihil potest, diaboli versutia videatur aliquid efficere, & ita per. Accidens inquit Clar. Nassium Præceptor Honorandus Log. Elect. l. i. c. 4. p. m. 78.

§. 11. Damnandi etiam Spiritus illi sunt, quos vocant familiares: Hoc enim dictu & auditu inter eruditos durum est, quod sepositis mediis legitimis Labore & oratione, illegitimos quibus in momento summa quævis assequi possunt, assumant, & magis se Diabolo, ut olim Jesuitæ quos Dæmon in India excepit, & filios suos vocavit, quam DEO, a quo tamen ultima salus, mancipare atque offerre velint. Ast tristissimam solet Tragedia hæc sortiri catastrophem. Bonâ enim ostendit, mala intendit pessimus Dæmon. vid. Hasenmüll. in Ord. Hist. Jesuit. c. 11. p. 427.

## Ita damnatis damnandis, adstruimus de Magiâ naturali adstruenda.

§. 1. Hæc est habitus ex libro naturæ crebris actionibus comparatus. Vide Excell. D. Pomarium Collegio Synopt. disput. 13 posit. 2. Est habitus non infusus, neque conatus, sed comparatus, ad quem *φύσις ἀποκρίνεται καὶ μάθεται* requiruntur statim. Hoc in habitu, quo nihil altius, aut plausibilibus dari potest, delicias ponit natura humana. Si quod nobilius, aut miraculo proximius in naturalibus scientiis aut excogitari potest, id reconditoris literaturæ Viri scientissimi Magiam dixerunt, inquit Johann. Baptista Port. lib. 1. c. 2.

§. 2. Divisionem, quâ dividitur in Theoreticam & Practicam adduximus supra, ideoque missâ theoreticâ unicuique hîc vel alterum ad practicam adjiciemus exemplum. Miramur sanè pegmata illa Romanorum in Theatris per se surgentia, & tabulata tacitè in sublimi crescentia, de quibus prolixè Plinius lib. 37. c. 15. & exactissimè Justus Lipsius de Amphi-

Amphitheatro c. 10. & seq. differunt. Miramur Julium Cæsarem Scaligerum exercitatione 316. scribentem: *Se naviculâ spontè mobilem, ac sui remigii autorem facturum esse nulla negotio.* Quod ipsum ut tanto viro credamus, movere nos potest Currus Veliferus, Tertiî Principis Mauritiî Nassovii, qui duabus horis Schevelina Pettemum ad quatuordecim millaria Hollandica, quæ singula justæ horæ iter excedunt, magis volitavit quam cucurrit. Unde Hugo Grotius admirandam ejus celeritatem satis eleganti depingit Epigrammate:

*Pbæbe quid attonitus nos aspicias? aspice vero?*

*Hoc curru poteras accelerare diem.*

Videatur desideratissimus noster Physicus disputatione priori de Magiâ naturali paragraph. 12. Miramur Aquilam illam Noribergenſium à Johanne Regiomontano fabrefactam, quæ Cæsarem ab alto salutavit. Vide Alſtedium libr. 4. Encyclop. c. 8. Sed quid foràs miramur, quæ domi mirari possumus? tria sanè sunt, quibus tota Antiquitas nil par habuit, inquit Beatus Sperlingius adducto teste Cardano in Institut. pag. m. 319. typographia, Bombardarum inventio, pyxis nautica. De quibus sera sibi gratulatura est semper posteritas. Et rectissimè Excell. Dominus Professor Ziegra Præceptor semper honorandus cum suo Dn. Respondente Disp. de Magia §. 13. Homines si mirari velint Dresdam ubi *τεχνημαθοφύλακειον* est vulgò *die Kunstammer* ablegarunt.

§. 3. Tota verò Magia naturalis, quamobrem etiam maximè expetenda, proximum finem habet, exactiorem mundi contemplationem; ultimum, gloriam DEI, quam etiam nos hisce tribuimus IPSI.

TANTUM.

